

四庫全書

集部

欽定四庫全書

樂府詩集卷七十二

宋 郭茂倩 輯

雜曲歌辭

古離別

王 適

昔歲驚楊柳高樓悲獨守今年芳樹枝孤棲怨別離珠  
簾晝不卷羅幔曉長垂苦調琴先覺愁容鏡獨知頻來  
雁度無消息罷去鴛文何用織夜還羅帳空有情春著

裙腰自無力青軒桃李落紛紛紫庭蘭蕙日氤氲已能  
顚顚今如此更復含情一待君

同前

常理

君御狐白裘妾居絀綺幃粟鈿金夾膝花錯玉搔頭離  
別生庭草征行斷戍樓蠨蛸網清曙茁茁落紅秋小膽  
空房怯長睂滿鏡愁為傳兒女意不用遠封侯

同前

姚係

涼風已嫋嫋露重木蘭枝獨上高樓望行人遠不知輕

寒入洞戶明月滿秋池鶯去鴻方至年年是別離

同前二首

趙微明

離別無遠近事歡情亦悲不聞車輪聲後會將何時去  
日忘寄書來日乖前期縱知明當還一夕千萬思

違別未幾日一日如三秋猶疑望可見日日上高樓唯  
見分手處白蘋滿芳洲寸心寧死別不忍生離愁

同前二首

孟郊

松山雲繚繞萍路水分離雲去有歸日水分無合時春

芳役雙眼春色柔四支楊柳織別愁千條萬條絲

山川古今路縱橫無斷絕來往天地間人皆有離別行  
衣未束帶中腸已先結不用看鏡中自知生白髮欲陳  
去畱意聲向言前咽愁結填心胸茫茫若為說荒郊煙  
莽蒼曠野風淒切處處得相隨人那不如月

同前

西江上風動麻姑嫁時浪西山為水水為塵不是人間  
離別人

同前

僧貫休

離恨如旨酒古今飲皆醉只恐長江水盡是兒女淚伊  
余非此輩送人空把臂他日再相逢清風動天地

同前

韋莊

晴煙漠漠柳毵毵不那離情酒半酣更把馬鞭雲外指  
斷腸春色在江南

生別離

梁簡文帝

離別四弦聲相思雙笛引一去十三年復無好音信

同前

孟雲卿

結髮生別離相思復相保何知日已久五變庭中草眇眇天海途悠悠吳江島但恐不出門出門無遠道遠道行既難家貧衣服單嚴風吹積雪晨起鼻何酸人生各有戀一作志豈不懷所安分明天上日生死誓同歡

同前

白居易

食藥不易食梅難藥能苦兮梅能酸未如生別之為難苦在心兮酸在肝晨雞載鳴殘月沒征馬重一作連嘶行

人出迴看骨肉哭一聲梅酸蘖苦甘如蜜黃河水白黃  
雲秋行人河邊相對愁天寒野曠何處宿棠梨葉戰風  
颼颼生離別生離別憂從中來無斷絕憂積一作心勞極  
血氣衰末年三十生白髮

長別離

吳邁遠

生離不可聞况復長相思如何與君別當我少年時蕙  
華每搖蕩妾心長一作空自持榮乏草木懼悴極霜露悲

富貴貌

一作身

難變負賤顏易衰持此斷君腸君亦宜自



疑淮陰有逸將析羽不曾飛楚有扛鼎士出門不得歸  
正為隆準公仗劍入紫微君才定何如白日下爭暉

遠別離

李白

遠別離古有皇英之二女乃在洞庭之南瀟湘之浦海  
水直下萬里深誰人不言此離苦日慘慘兮雲冥冥猩  
猩啼烟兮鬼嘯雨我縱言之將何補皇宮竊恐不照余  
之忠誠雷馮馮兮欲吼怒堯舜當之亦禪禹君失臣兮  
龍為魚權歸臣兮鼠變虎或云堯幽囚舜野死九疑聯

綿皆相似重瞳孤墳竟何是  
帝子泣兮綠雲間隨風波  
兮去無還慟哭兮遠望見  
蒼梧之深山蒼梧山崩湘  
水絕竹上之淚乃可滅

同前

張籍

蓮葉團團杏花折長江鯉魚  
鰭鱗赤念君少年棄親戚  
千里萬里獨為客誰言遠別  
心不易天星墜地能為石  
幾時斷得城南陌勿使居人  
有行役

同前二首

令狐楚

楊柳黃金穗  
梧桐碧玉枝  
春來消息斷  
早晚是歸時  
玳織鴛鴦履  
金裝翡翠簪  
良人相問著  
不擬到城南

久別離

李白

別來幾春未還家  
玉窗五見櫻桃花  
況有錦字書開緘  
使人嗟至此腸斷  
彼心絕雲鬢綠鬢  
罷攬一作流結愁如

迴飈亂白雪  
去年寄書報陽臺  
今年寄書重相催  
胡為東風為我吹  
行雲使西來  
待來竟不來  
落花寂寂委青

苔

新別離

戴叔倫

手把杏花枝，未曾別離黃昏掩閨後，寂寞自心知。

今別離

崔國輔

送別未能旋相望，連水口船行欲映舟。幾度急搖手。

暗別離

劉氏瑤

槐花結子桐葉焦，單飛越鳥啼青霄。翠軒輾雲輕遙遙，  
燕脂淚迸紅線條。瑤草歇芳心耿耿，玉珮無聲畫屏冷。  
朱弦暗斷不見人，風動花枝月中影。青鸞脉脉西飛去。

海濶天高不知處

潛別離

白居易

不得哭潛別離不得語暗相思  
兩心之外無人知深籠  
夜鎖獨棲鳥利劍春斷連理枝  
河水雖濁有清日烏頭  
雖黑有白時唯有潛離與暗別  
彼此甘心無後期

別離曲

張籍

行人結束出門去馬蹄幾時踏門路  
憶昔君初納綵時  
不言身屬邊陽戍  
早知今日當別離  
成君家計良為誰

男兒生身自有役那得悞我少年時不如逐君征戰死  
誰能獨老空閨裏

同前

陸龜蒙

丈夫非無淚不灑離別間仗劍對樽酒恥為遊子顏  
蝮蛇一螫手壯士疾解腕所思在功名離別何足歎

西洲曲

古詞

憶梅下西洲折梅寄江北單衫杏子紅雙鬢鵝鵲色  
西洲在何處兩漿橋頭渡日暮伯勞飛風吹烏白樹樹下

即門前門中露翠鈿開門郎不至出門採紅蓮採蓮南  
塘秋蓮花過人頭低頭弄蓮子蓮子青如水置蓮懷袖  
中蓮心徹底紅憶郎郎不至仰首望飛鴻鴻飛滿西洲  
望郎上青樓樓高望不見盡日欄干頭欄干十二曲垂  
手明如玉卷簾天自高海水搖空綠海水夢悠悠君愁  
我亦愁南風知我意吹夢到西洲

同前

一作西洲詞

溫庭筠

悠悠復悠悠昨日下西洲西洲

一作州

風色好遙見武昌

樓武昌何鬱鬱儂家定無匹小婦被流黃登樓撫瑤瑟  
朱弦繁復輕素手直淒清一彈三四解掩抑似含情南  
樓登且望西江廣復平艇子搖兩槳催過石頭城門前  
烏臼樹慘澹天將曙鷗鵲一作鷗鵲飛復還郎隨早帆去迴  
頭語同伴定復負情儂去帆不安幅作抵使西風他日  
相尋索莫作西洲客西洲人不歸春草年年碧

荊州樂

宗 夬

荊州樂蓋出於清商曲江陵樂荊州即江



陵也有紀南城在江陵縣東梁簡文帝荆  
州歌云紀城南里望朝雲雉飛麥熟妾思  
君是也又有紀南歌亦出於此

迢遞樓雉懸參差臺觀雜城闕自相望雲霞紛颯沓

同前

李白

白帝城邊足風波瞿塘五月誰敢過荊州麥熟壘成蛾  
綠絲憶君頭緒多撥穀飛鳴奈妾何

同前二首

劉禹錫

渚宮楊柳暗麥城朝雉飛可憐踏青伴乘暖著輕衣  
今日好南風商旅相催發沙頭檣竿上始見春江闊

荊州泊

李端

南樓西下時月裏聞來棹桂水舳舻回荊州津濟開移  
帷望星漢引帶思容貌今夜一江人唯應妾身覺

紀南歌

劉禹錫

酈道元水經注曰楚之先僻處荊山後遷  
紀郢即紀南城也十道志曰昭王十年吳

通漳水灌紀南城入赤湖郢城遂破杜預  
左傳注曰今南郡江陵縣北紀南城故楚  
國也

風煙紀南城塵土荆門路天寒多獵騎走上樊姬墓

宜城歌

劉禹錫

通典曰宜城楚之鄢都謂之郢有蠻水又  
有漢宜城縣在今縣南舊名率道天寶中  
改焉十道志曰宜城漢縣宋孝武大明元

年以胡人流寓者立華山郡於大堤村古  
名上供梁為率道俗呼大堤其地出美酒  
故曰宜城竹葉酒也

野水遶空城行塵起孤驛花臺側生樹石碣陽鍋額靡  
靡度行人溫風吹宿麥

南郡歌

陸厥

江南可採蓮蓮生荷已大旅雁向南飛浮雲復如蓋望  
美積風露疎麻成襟帶雙珠惑漢臯蛾眉迷下蔡玉齒

徒粲然誰與啓含貝

長干曲

古詞

逆浪故相邀菱舟不怕搖妾家楊子住便弄廣陵潮

同前四首

崔顥

君家定何處妾住在橫塘停舟暫借問或恐是同鄉  
家臨九江水去來九江側同是長干人生小不相識  
下渚多風浪蓮舟漸覺稀那能不相待獨自逆潮歸  
三江潮水急五湖風浪湧由來花性輕莫畏蓮舟重

長干行二首

李白

妾髮初覆額折花門前劇郎騎竹馬來遶牀弄青梅同  
居長千里兩小無嫌猜十四為君婦羞顏尚不一作開

低頭向暗壁千喚不一迴十五始展眉願同塵與灰常

存抱柱信豈

一作恥

上望夫臺十六君遠行瞿塘濫預堆

五月不可觸猿鳴

一作聲

天上哀門前遲

一作舊

行跡一一

生綠

一作蒼

苔苔深不能掃落葉秋風早八月蝴蝶來雙

飛西園草感此傷妾心坐愁紅顏老早晚下三巴預將

書報家相迎不道遠直至長風沙

憶妾

一作昔

深閨裏烟塵不曾識嫁與長干人沙頭候風

色五月南風興思君在

一作下

巴陵八月西風起想君發

楊子去來悲如何會少別離多湘潭幾日到妾夢越風

波昨夜狂風度吹折江頭樹綠綠暗無邊行人在何處

北客真王公朱衣滿江中日暮來投宿數朝不肯東好

乘浮雲驄佳期蘭渚東鴛鴦綠浦上翡翠錦屏中自憐

十五餘顏色桃李紅那作商人婦愁水復愁風

同前

張潮


壻貧如珠玉壻富如埃塵貧時不忘舊富貴多寵新妾  
本富家女與君為偶匹惠好一何深中門不曾出妾有  
繡衣裳歲蕤金鏤光念君貧且賤易此從遠方遠方三  
千里發去悔不已日暮情更來空望去時水孟夏麥始  
秀江上多南風商賈歸欲盡君今尚巴東巴東有巫山  
窈窕神女顏常恐遊此山果然不知還

小長干曲

崔國輔



月暗送湖風相尋路不通菱歌唱不輟知在此塘中



樂府詩集卷七十二

欽定四庫全書

集部

樂府詩集卷七十三

三五

詳校官庶吉士

臣柳邁祖

助教

臣

常循覆勘

總校官知縣

臣繆

琪

校對官編修

臣秦

瀛

謄錄監生

臣

孫承基

欽定四庫全書

樂府詩集卷七十三

雜曲歌辭

杞梁妻

吳邁遠

崔豹古今注曰杞梁妻者杞殖妻妹朝日之所作也殖戰死妻曰上則無父中則無夫下則無子人生之苦至矣乃抗聲長哭

杞都城感之而頽遂投水而死其妹悲姊  
之貞乃作歌名曰杞梁妻焉梁殖之字也  
列女傳曰齊莊公襲莒殖戰而死其妻無  
所歸乃就其夫之尸於城下而哭十日而  
城為之崩既葬遂赴淄水而死琴操曰杞  
梁妻嘆齊杞梁殞其妻之所作也

燈竭從初明蘭凋猶早薰扼腕非一代千載炳遺文貞  
夫淪莒役杜弔結齊君驚心眩白日長洲崩秋雲精微

貫宮旻高城為隕墳行人既迷徑飛鳥亦失羣壯哉金石軀出門形影分一隨塵壤消聲譽誰共論

同前

僧貫休

秦之無道兮四海枯築長城兮遮北胡築人築土一萬里杞梁貞婦啼嗚嗚上無父兮中無夫下無子兮孤復孤一號城崩塞色苦再號杞梁骨出土疲魂饑魄相逐歸陌上少年莫相非

董嬌饒

宋子侯

洛陽城東路桃李生路傍花花自相對葉葉自相當春  
風東北起花葉正低昂不知誰家子提籠行採桑纖手  
折其枝花落何颺颺請謝彼妹子何為見損傷高秋八  
九月白露變為霜終年會飄墮安得久馨香秋時自零  
落春月復芬芳何時盛年去懽愛永相忘吾欲竟此曲  
此曲愁人腸歸來酌美酒挾瑟上高堂

焦仲卿妻

古詞

焦仲卿妻不知誰氏之所作也其序曰漢

末建安中廬江府小吏焦仲卿妻劉氏為  
仲卿母所遣自誓不嫁其家逼之乃沒水  
而死仲卿聞之亦自縊於庭樹時人傷之  
而為此辭也

孔雀東南飛五里一徘徊十三能織素十四學裁衣十  
五彈箜篌十六誦詩書十七為君婦心中常苦悲君既  
為府吏守節情不移雞鳴入機織夜夜不得息三日斷  
五匹大人故嫌遲非為織作遲君家婦難為妾不堪驅

使徒留無所施便可白公姥及時相遣歸府吏得聞之  
堂上啓阿母兒已薄祿相幸復得此婦結髮同枕席黃  
泉共為友共事二三年始爾未為久女行無偏斜何意  
致不厚阿母謂府吏何乃太區區此婦無禮節舉動自  
專由吾意久懷忿汝豈得自由東家有賢女自名秦羅  
敷可憐體無比阿母為汝求便可速遣之遣去慎莫留  
府吏長跪告伏惟啓阿母今若遣此婦終老不復取阿  
母得聞之搥牀便大怒小子無所畏何敢助婦語吾已



失恩義會不相從許府吏默無聲再拜還入戶舉言謂  
新婦哽咽不能語我自不驅卿逼迫有阿母卿但暫還  
家吾今且報府不久當歸還還必相迎取以此下心意  
慎勿違吾語新婦謂府吏勿復重紛紜往昔初陽歲謝  
家來貴門奉事循公姥進止敢自專晝夜勤作息伶俜  
縈苦辛謂言無罪過供養卒大恩仍更被驅遣何言復  
來還妾有繡腰襦歲歲自生光紅羅複斗帳四角垂香  
囊箱簾六七十綠碧青絲繩物物各自異種種在其中

人賤物亦鄙不足迎後人留待作遣施於今無會因時  
時為安慰久久莫相忘雞鳴外欲曙新婦起嚴妝著我  
繡袂裙事事四五通足下躡絲履頭上玳瑁光腰著流  
紈素耳著明月璫指如削葱根口如含朱丹纖纖作細  
步精妙世無雙上堂謝阿母母聽去不止昔作女兒時  
生小出野里本自無教訓魚愧貴家子受母錢帛多不  
堪母驅使今日還家去念母勞家裏卻與小姑別淚落  
連珠子新婦初來時小姑如我長勤心養公姥好自相

扶將初七及下九嬉戲莫相忘出門登車去涕落百餘  
行府吏馬在前新婦車在後隱隱何甸甸俱會大道口  
下馬入車中低頭共耳語誓不相隔鄉且暫還家去吾  
今且赴府不久當還歸誓天不相負新婦謂府吏感君  
區區懷君既若見錄不久望君來君當作磐石妾當作  
蒲葦蒲葦紐如絲磐石無轉移我有親父兄性行暴如  
雷忍不任我意逆以前我懷舉手長勞勞二情同依依  
入門上家堂進退無顏儀阿母大拊掌不圖子自歸十

三教汝織十四能裁衣十五彈箏篴十六知禮儀十七  
遣汝嫁謂言無誓違汝今無罪過不迎而自歸蘭芝慙  
阿母兒實無罪過阿母大悲推還家十餘日縣令遣媒  
來云有第三郎窈窕世無雙年始十八九便言多令才  
阿母謂阿女汝可去應之阿女銜淚答蘭芝初還時府  
吏見丁寧結誓不別離今日違情義恐此事非奇自可  
斷來信徐徐更謂之阿母白媒人貧賤有此女始適還  
家門不堪吏人婦豈合令郎君幸可廣問訊不得便相

許媒人去數日尋遣丞請還誰有蘭家女承籍有宦官  
云有第五郎嬌逸未有婚遣丞為媒人主簿通語言直  
說太守家有此令郎君既欲結大義故遣來貴門阿母  
謝媒人女子先有誓老姥豈敢言阿兄得聞之悵然心  
中煩舉言謂阿妹作計何不量先嫁得府吏後嫁得郎  
君否忝如天地足以榮汝身不嫁義即體其住欲何云  
蘭芝仰頭答理實如兄言謝家事夫壻中道還兄門處  
分適兄意那得自任專雖與府吏要渠會永無緣登即

相許和便可作婚姻媒人下牀去諾諾復爾爾還部白  
府君下官奉使命言談大有緣府君得聞之心中大歡  
喜視歷復開書便利此月內六合正相應良吉三十日  
今已二十七卿可去成婚交語速裝束絡繹如浮雲青  
雀白鵲舫四角龍子幡婀娜隨風轉金車玉作輪躑躅  
青驄馬流蘇金鏤鞍齋錢三百萬皆用青絲穿雜綵三  
百匹交廣市鮭珍從人四五百鬱鬱登郡門阿母謂阿  
女適得府君書明日來迎汝何不作衣裳莫令事不舉

阿女默無聲手巾掩口啼淚落便如瀉移我瑤璃榻出  
置前牕下左手持刀尺右手執綾羅朝成繡袂裙晚成  
單羅衫曉曉日欲暝愁思出門啼府吏聞此變因求假  
暫歸未至二三里摧藏馬悲哀新婦識馬聲躡履相逢  
迎悵然遙相望知是故人來舉手拍馬鞍嗟嘆使心傷  
自君別我後人事不可量果不如先願又非君所詳我  
有親父母逼迫兼弟兄以我應他人君還何所望府吏  
謂新婦賀卿得高遷磐石方可厚可以卒千年蒲葦一

時紉便作旦夕間卿當日勝貴吾獨向黃泉新婦謂府吏何意出此言同是被逼迫君爾妾亦然黃泉不相見勿違今日言執手分道去各各還家門生人作死別恨恨那可論念與世間辭千萬不復全府吏還家去上堂拜阿母今日大風寒寒風摧樹木嚴霜結庭蘭兒今日冥冥令母在後單故作不良計勿復怨鬼神命如南山石四體康且直阿母得聞之零淚應聲落汝是大家子仕宦於臺閣慎勿為婦死貴賤情何薄東家有賢女



窈窕豔城郭阿母為汝求便復在旦夕府吏再拜還長  
嘆空房中作計乃爾立轉頭向戶裏漸見愁煎迫其日  
牛馬嘶新婦入青廬菴菴黃昏後寂寂人定初我命絕  
今日魂去尸長留攬裙脫絲履舉身赴清池府吏聞此  
事心知長別離徘徊庭樹下自掛東南枝兩家求合葬  
合葬華山傍東西植松柏左右種梧桐枝枝相覆蓋葉  
葉相交通中有雙飛鳥自名為鴛鴦仰頭相向鳴夜夜  
達五更行人駐足聽寡婦赴傍徨多謝後世人戒之慎

勿忘

盧女曲

崔顥

樂府解題曰盧女者魏武帝時宮人也故將軍陰升之姊七歲入漢宮善鼓琴至明帝崩後出嫁為尹更生妻梁簡文帝妾薄命曰盧姬嫁日晚非復少年時蓋傷其嫁遲也

二月春來半宮中日漸長柳垂金屋暖花覆玉樓香拂

匣先臨鏡調笙更炙簧還將盧女曲夜夜奉君王

盧姬篇

崔顥

盧姬小小魏王家綠鬢紅脣桃李花魏王綺樓十二重  
水精簾箔繡芙蓉白玉闌千金作柱樓上朝朝學歌舞  
前堂後堂羅袖人南窻北牕花發春翠幌朱簾鬪絃管  
一奏一彈雲欲斷君王日晚下朝歸鳴環珮玉生光輝  
人生今日得驕貴誰道盧姬身細微

邯鄲才人嫁為廚養卒婦謝朓

生平宮閣裏出入侍丹墀開筍方羅縠窺鏡比蛾眉初  
別意未解去久日生悲顚顚不自識嬌羞餘故姿夢中  
忽髣髴猶言承讌私

同前

李白

妾本叢臺女揚蛾入丹闕自倚顏如花寧知有凋歇一  
辭玉階下去若朝雲沒每憶邯鄲城深宮夢秋月君王  
不可見惆悵至明發

楊白花

梁書曰楊華武都仇池人也少有勇力容貌雄偉魏胡太后逼通之華懼及禍乃率其部曲來降胡太后追思之不能已為作楊白華歌辭使宮人晝夜連臂蹋足歌之聲甚悽惋故南史曰楊華本名白花奔梁後名華魏名將楊大眼之子也

陽春二三月楊柳齊作花春風一夜入閨闥楊花飄蕩落南家含情出戶腳無力拾得楊花淚沾臆秋去春還

雙燕子願銜楊花入窠裏

同前

柳宗元

楊白花風吹度江水坐令宮樹無顏色  
搖蕩春光千萬里茫茫曉日下長秋  
哀歌未斷城鷄起

茱萸女

梁簡文帝

茱萸生狹邪結子復銜花  
遇逢纖手摘濫得映鉛華  
雜興鬟髻插偶逐鬢鈿斜  
東西爭贈玉縱橫來問家  
不無夫壻馬空駐使君車

同前

萬楚

山陰柳家女九日採茱萸復得東隣伴雙為陌上姝  
插花向高髻結子置長裾作性恒遲緩非關姁丈夫平明  
折林樹日入反城隅俠客邀羅袖行人挑短書蛾眉自有  
主年少莫踟躕

舞媚娘二首

陳後主

樂苑曰舞媚娘大舞媚娘並羽調曲也唐  
書曰高宗永徽末天下歌舞媚娘未幾立

武氏為皇后按陳後主已有此歌則永徽  
所歌蓋舊曲云

樓上多嬌豔當牕併三五爭弄遊春陌相邀開繡戶轉  
態結紅裙含嬌拾翠羽畱賓乍拂弦託意時移柱

淇水變新臺春醺當夏開玉面含羞出金鞍排夜一作暗

來春日多一作好風光尋觀向一作戲市傍轉身移佩響牽

袖起衣香

同前

庾信



朝來戶前照鏡含笑盈盈自看睂心濃黛直點額角輕  
黃細安祇疑落花謾去復道春風不還少年唯有懽樂  
飲酒那得畱殘

于闐採花

山川雖異所草木尚同春亦如溱洧地自有採花人

同前

李白

于闐採花人自言花相似明妃一朝西入胡胡中美女  
多羞死乃知漢地多名姝胡中無花可方比丹青能令

醜者妍無鹽翻在深宮裏自古妬蛾眉胡沙埋皓齒

秦王卷衣

吳均

樂府解題曰秦王卷衣言咸陽春景及宮

闕之美秦王卷衣以贈所歡也唐李白有

秦女卷衣

咸陽春草芳秦帝卷衣裳玉檢茱萸匣金泥蘇合香初

芳薰複帳餘輝耀玉牀當須晏朝罷持此贈龍

一作華陽

秦女卷衣

李白

天子居未央妾侍一作來卷衣裳顧無紫宮寵敢拂黃金

牀水至亦不去熊來尚可當微身奉一作捧日月飄若螢

火光願君採葑菲無以下體妨

愛妾換馬

梁簡文帝

樂府解題曰愛妾換馬舊說淮南王所作

疑淮南王即劉安也古辭今不傳

功名幸多種何事苦生離誰言似白玉定是媿青驪必  
取匣中釧迴作飾金羈真成恨不已願得路傍兒

同前

劉孝威

驄馬出樓蘭一步九盤桓小史贖金絡良工送玉鞍龍  
驂來甚易烏孫去實難麟膠妾猶有請為急弦彈

同前

庾肩吾

渥水出騰駒湘川實應圖來從西北道去逐東南隅琴  
聲悲玉匣山路泣蘼蕪似鹿將含笑千金會不俱

同前

僧法宣

朱鬣飾金鑣紅妝束素腰似雲來蹁躑如雪去飄飄桃

花含淺汗柳葉帶餘嬌  
騁先將獨立雙絕不俱標

同前

張祐

一面妖桃千里蹄  
嬌姿駿骨價應齊  
乍牽玉勒辭金棧  
催整花鈿出繡閨  
去日豈無沾袂泣  
歸時還有頓銜嘶  
嬋娟躑躅春風裏  
揮手搖鞭楊柳堤

綺閣香銷華殿空  
忍將行雨換追風  
休憐柳葉雙眉翠  
卻愛桃花兩耳紅  
侍宴永辭春色裏  
趨朝休立漏聲中  
恩勞未盡情先盡  
暗泣嘶風兩意同

欽定四庫全書

樂府詩集  
卷七十三

樂府詩集卷七十三

欽定四庫全書

樂府詩集卷七十四

宋 郭茂倩 輯

雜曲歌辭

枯魚過河泣

古 辭

枯魚過河泣何時悔復及作書與魴鱖相教慎出入

同前

李 白

白龍改常服偶被豫且制誰使爾為魚徒勞訴天帝作

書報鯨鯢勿恃風濤勢濤落歸泥沙翻遭螻蟻噬萬乘  
慎出入柏人以為誠一作識

冉冉孤生竹

古辭

冉冉孤生竹結根泰山阿與君為新婚兔絲附女蘿兔  
絲生有時夫婦會有宜千里遠結婚悠悠隔山陂思君  
令人老軒車來何遲傷彼蕙蘭花含英揚光輝過時而  
不采將隨秋草萎君亮執高節賤妾亦何為

同前

何偃



流萍依清源孤鳥親宿止蔭幹相經榮風波能終始草  
生有日月婚年行及紀思欲侍衣裳關山分萬里徒作  
春夏期空望良人軌芳色宿昔事誰見過時美涼鳥臨  
散一作秋竟歡願亦云已豈意倚君恩坐守零落耳

棗下何纂纂

梁簡文帝

古咄咄歌曰棗下何攢攢榮華各有時棗  
欲初赤時人從四邊來棗適今日賜誰當  
仰視之潘安仁笙賦曰詠園桃之天天歌

東下之纂纂歌曰東下纂纂朱實離離宛  
其死矣化為枯枝纂纂棗花也棗之纂纂  
盛貌實之離離將衰言榮謝之各有時也  
垂花臨碧澗結翠依丹巘非直入游宮兼期植靈苑落  
日芳春苒遊人歌吹晚弱刺引羅衣朱實凌還憶且歡  
洛浦詞無羨安期遠

同前二首

王 胄

柳黃知節變草綠識春歸復道含雲影重簷照日輝

御柳長條翠宮槐細葉開還得聞春曲便逐鳥聲來

西園遊上才

沈約詠月詩曰月華臨靜夜夜靜滅氛埃  
方暉竟戶入圓影隙中來高樓切思婦西  
園遊上才因以為題也

西園遊上才清夜可徘徊月桂臨樽上山雲影蓋來飛  
花隨燭度疎葉向帷開當軒顧應阮還覺賤鄒枚

薄暮動弦歌

沈君攸

柳谷向夕沉餘日蕙樓臨砌徙斜光金戶半入叢林影  
蘭徑時移落藥香絲繩玉壺傳綺席秦箏趙瑟響高堂  
舞裙拂履喧珠珮歌響出扇繞塵梁雲邊雪飛弦柱促  
畱賓但須羅袖長日暮歌鍾恒不倦處處行樂為時康  
羽觴飛上苑

沈君攸

楚辭曰瑤漿密勺實羽觴張衡西京賦曰  
促中堂之狹坐羽觴行而無算羽觴謂杯  
上綴羽以速飲漢書音義曰羽觴作生爵

形是也

上路薄晚風塵合禁苑初春氣色華石徑斷絲開蔓草  
山流細沫擁浮花魚文熠燿含餘日鶴蓋低昂照落霞  
隔樹銀鞍喧寶馬分衢玉馱動香車車馬處處盡成陰  
班荆促席對芳林藤杯屢動情仍暢翠樽引滿趣彌深  
山陽倒載非難得宜城醇醞促須斟半醉驪歌應可奏  
上客莫慮擲黃金

桂檝泛河中

沈君攸

欽定四庫全書

樂府詩集  
卷七十四

黃河曲渚通千里濁水分流引八川仙查逐源終未極

蘇亭

一作漢帝

遺跡尚難遷眇眇雲根侵遠樹蒼蒼水氣雜

一作合

遙天波影雜霞無定色湍文觸岸不成圓赤馬青

龍

一作驪

交出浦飛雲蓋海遠凌煙蓮舟渡沙轉不礙桂

檝距浪弱難前風急金烏翅自轉汀長錦纜影微懸榜  
人欲歌先扣柂津吏猶醉彊持船河隄極望今如此行  
杯落葉詎虛傳

內殿賦新詩

江總

兔影脉脉照金鋪  
虬水滴滴寫玉壺  
綺翼雕甍邇清漢

虹梁紫

一作柱

麗黃圖風高暗綠凋  
殘柳雨駛芳紅溼

晚笑三五二八佳  
年少百萬千金買  
歌笑偏羞

一作著

故

人織素詩願奉秦聲采蓮

一作菱

調織女今夕渡銀河當

見清

一作新

秋停玉梭

武溪深行

馬援

一曰武陵深行崔豹古今註曰武溪深馬

援南征之所作也援門生爰寄生善吹笛

援作歌令寄生吹笛以和之名曰武漢深  
滔滔武漢一何深鳥飛不度獸不敢臨嗟哉武漢兮多  
毒淫

同前

劉孝勝

武漢深不測水安舟復輕暫侶莊生釣還滯鄂君行櫂  
歌爭後發譟鼓逐前征秦上山川險黥中木石并林壑  
秋籟急猿哀夜月明澄源本千仞回峯忽萬縈昭潭讓  
無底太華推削成日落野通氣目極悵餘情下流曾不



濁長蘄寂無聲羞學滄浪水濯足復濯纓

半渡溪

劉孝威

樂府解題曰半渡溪言戰而半涉溪水見  
迫所言皆嶺南地里與武溪深相類梁元  
帝又有半路溪則言相逢隔溪已識行步  
辭旨與此全殊

本廁偏伍伴一戰殄凶渠制賜文犀節驛報紫泥書入  
營陳御蓋還家乘紫車皇恩空以重

一作知  
已重

丹心恨不

紆渡瀘且不畏臨溪嗟有餘

半路溪

梁元帝

相逢半路溪隔溪猶不渡望望判知是翩翩識行步摘  
贈蘭澤芳欲表同心句先將持一作動舊情恐君疑妾妬

昔思君

傅玄

昔君與我兮形影潛結今君與我兮雲飛雨絕昔君與  
我兮音響相和今君與我兮落葉去柯昔君與我兮金  
石無虧今君與我兮星滅光離

妾安所居

吳均

賤妾先有寵蛾眉進不遲一從西北麗無復城南期何  
因暫艷逸豈為乏妍姿徒有黃昏望寧遇青樓時惟惜  
應門掩方餘永巷悲匡牀終不共何由橫自思

飲酒樂

陸機

樂苑曰飲酒樂商調曲也

蒲萄四時芳醇瑠琤千鍾舊賓夜飲舞遲銷燭朝醒弦  
促催人

同前

飲酒須飲多人生能幾何百年須受樂莫厭管弦歌

同前

聶夷中

日月似有事一夜行一周草木猶須老人生得無愁一  
飲解百結再飲破百憂白髮欺貧賤不入醉人頭我願  
東海水盡向杯中流安得阮步兵同入醉鄉遊

淫思古意

顏竣

春風飛遠方紀轉流思堂貞節寄君子窮閨妾所藏裁

書露微疑千里問新知君行過三稔故心久當移

思公子

王融

楚辭九歌曰靄填填兮雨冥冥猿啾啾兮  
狖夜鳴風颯颯兮木蕭蕭思公子兮徒離  
憂思公子蓋出於此

春盡風颯颯蘭凋木脩脩王孫久為客思君徒自憂

同前

費昶

公子才氣饒凌雲自飄飄東出關雞道西登飲馬橋夕

宴銀為燭朝燔桂作焦虞卿亦何命窮極苦無聊

同前

邢劭

綺羅日減帶桃李無顏色思君君未歸歸來豈相識

王孫遊

謝朓

楚辭招隱士曰王孫遊兮不歸春草生兮

萋萋王孫遊蓋出於此

綠草蔓

一作夢

如絲雜樹紅英發無論君不歸君歸芳已

歇

同前

王融

置酒登廣殿開襟望所思春草行已歇何事久佳期

一本

辭同思  
公子

同前

崔國輔

自與王孫別頻看黃鳥飛應由春草誤著處不成歸

陽翟新聲

王融

隋書樂志曰西涼樂曲陽翟新聲神白馬  
之類皆生於胡戎歌非漢魏遺曲也

懷春發下蔡含笑向陽城恥為飛雉曲好作鷓鴣鳴

金樂歌

梁簡文帝

槐香欲覆井楊柳正藏鴉山鑪當

一作好

無比玉構火聰

賒牀頭辟繩結鏡上領巾斜鐵鍾種梁子銅樞生秦花

開門拋水柱

一作信

城按特言家

同前

梁元帝

啼鳥怨別偶曙鳥憶誰家石闕題書字金燈飄落花東  
方曉星沒西山晚日斜穀衫迴廣袖團扇掩輕紗暫借



青驄馬來送黃牛車

同前

房篆

前溪流碧水後渚映青天  
登臺臨寶鏡開牕對綺錢  
玉顏光粉色羅袖拂金鈿  
春風散輕蝶明月映新蓮  
摘花競時侶催指及芳年

樂未央

沈約

億舜日萬堯年詠湛露歌採蓮  
願雜百和氣宛轉金鑪前

南征曲

蕭子顯

櫂歌來楊女操舟驚越人圖蛟怯水伯照鷁竦江神

發白馬

費昶

通典曰白馬春秋時衛國曹邑有黎陽津  
一曰白馬津酈生云守白馬之津是也發  
白馬言征伐而發兵於此也

家本樓煩俗召募羽林兒怖羗角觝戲習戰昆明池弓  
弦不復挽劒衣恆露鍔一辭豹尾內長別屬車垂白馬

今雖發黃河未結漸寄言閨中婦逢春心勿移

同前

李白

將軍發白馬旌節渡黃河  
蕭鼓聒川嶽滄溟湧洪一作濤

波武安有振瓦易水無寒歌  
鐵騎若雪山飲流涸潯池  
揚兵獵月窟轉戰略朝那  
倚劒登燕然邊峯列嵯峨  
蕭條萬里外耕作五原多  
一掃清大漠已虎戢金戈

濟黃河

謝微

積陰晦平陸淒風結算序  
朝辭金谷戍夕逗黃河渚  
赤

兔徒聯翩青鳬詎容與淚甚聲難發悲多袖未舉虛薄  
謬君恩方嗟別宛許

同前

江總

蔥山淪外城鹽澤隱遐方兩京分際遠九道派流長未  
殫所聞見無待驗詞章留連嗟太史惆悵踐黎陽導波  
縈地節疏氣耿天潢憫周闕用寶嘉晉肇為梁

同前

蕭慤

大蕃連帝室驂駕奉皇猷未明驅羽騎凌晨方畫舟津

城度維錦岸柳夾緹油鍾聲颺別島旗影照蒼流早光  
生劍服朝風起節樓滔滔細波動喬喬輕舳浮迴橈避  
近磧放舳下前洲全疑上天漢不異謁蓬丘望知雲氣  
合聽識水聲秋從軍何等樂喜從神仙遊

結襪子

溫子昇

帝王世紀曰文王伐崇侯虎至五鳳墟襪  
係解顧左右無可使者乃俯而結之武王  
至商郊牧野誓衆左仗黃鉞右秉白旄王

襪解莫肯與王結王乃釋旄俯而結之漢書曰王生者善為黃老言處士嘗召居廷中公卿盡會立王生老人曰吾襪解顧謂張釋之為我結襪釋之跪而結之既已人或讓王生獨奈何廷辱張廷尉如此王生曰吾老且賤自度終亡益於張廷尉廷尉方天下名臣吾故聊使結襪欲以重之諸公聞之賢王生而重釋之唐李白辭大抵

言感恩之重而以命相許也

誰能訪故劒會自逐前魚裁紉終委篋織素空有餘

同前

李白

燕南壯士吳門豪筑中置鉛魚隱刀感君恩重許君命  
太山一擲輕鴻毛

沐浴子

澡身經蘭汜濯髮係芳洲折榮聊躑躅攀桂且淹留

同前

李白

沐芳莫彈冠浴蘭莫振衣處世忌太潔志

一作至

人貴藏

暉滄浪有釣叟吾與爾同歸

安定侯曲

溫子昇

封疆在上地鍾鼓自相和美人當牕舞妖姬掩扇歌

澤雉

莊子曰澤雉十步一啄百步一飲不期畜

乎樊中澤雉曲蓋取此也古今樂錄曰鳳

將雛以澤雉送曲



擅場延繡頸朝飛弄綺翼飲啄常自在驚雄恒不息

短簫

張嶠

促柱弦始繁短簫吹初亮舞袖拂長席鍾音由簏颺已落簷瓦間復繞梁塵上時屬清夏陰恩暉亦非望

伍子胥

鮑機

忠孝誠無報感義本投身日暮江波急誰憐漁丈人楚

墓悲猶

一作空

在吳門恨

一作怨

未申

清涼

張率

登臺待初景帳殿藹餘晨羅帷

一作帳

夕風濟清氣尚波

人長簟涼可仰平莞溫未親幸願同枕席為君橫自陳

樂府詩集卷七十四

欽定四庫全書

樂府詩集卷七十五

宋 郭茂倩 輯

雜曲歌辭

三臺二首

韋應物

後漢書曰蔡邕為侍御史又轉持書侍御史遷尚書三日之間周歷三臺馮鑑續事始曰樂府以邕曉音律製三臺曲以悅邕

希其厚遇劉禹錫嘉話錄曰三臺送酒蓋  
因此北齊高洋毀銅雀臺築三個臺宮人  
拍手呼上臺送酒因名其曲為三臺李氏  
資暇曰三臺三十拍促曲名昔鄴中有三  
臺石季龍常為宴遊之所樂工造此曲以  
促飲未知孰是鄴都故事曰漢獻帝建安  
五年曹操破袁紹於鄴十五年築銅雀臺  
十八年作金虎臺十九年造冰井臺所謂

鄴中三臺也北史曰齊文宣天保中營三臺於鄴因其舊基而高博之九年臺成改銅雀曰金鳳金虎曰聖應冰井曰崇光云按樂苑唐天寶中羽調曲有三臺又有急三臺

一年一年老去明日後日花開未報長安平定萬國豈得銜杯冰泮寒塘始綠雨餘百草皆生朝來門閤無事晚下高齋有情

上皇三臺

不寐倦長更披衣出戶行月寒秋竹冷風切夜牕聲

突厥三臺

雁門山上雁初飛馬邑關中馬正肥日肝山西逢驛使  
慙慙南北送征衣

宮中三臺二首

王建

魚藻池邊射鴨芙蓉園裏看花日色柘袍相似不著紅  
鸞扇遮

池北池南草綠殿前殿後花紅  
天子千年萬歲未央明  
月清風

江南三臺四首

王建

楊州橋邊小婦長  
干市裏商人三年不得消息  
各自拜鬼神

青草湖邊草色飛  
猿嶺上猿聲萬里三湘客到  
有風有雨人行

樹頭花落花開  
道上人去人來  
朝愁暮愁即老  
百年幾

度三臺

聞身彊健且為

一作聞身康健早為

頭白齒落難追准擬百年千

歲能得幾許多時

陵雲臺

謝舉

魏志曰文帝黃初元年十二月初營洛陽

宮戊午幸洛陽二年築陵雲臺劉義慶世

說曰陵雲臺樓觀精巧先秤衆木輕重然

後構造無錙銖相負揭臺高峻恆隨風動



搖楊龍驤洛陽記曰陵雲臺高二十三丈  
登之見孟津也

綺甍懸桂棟隱曖傍喬柯勢高凌玉井臨迴度金波易  
覺涼風至早飛秋雁過高臺相思一作憶曲望遠騷人歌

幸屬一作矚此迢遞知承雲霧多

同前

王褒

高臺懸百尺中夕殊未窮北臨酸棗寺西眺明光宮城  
旁抵雙府林裏對相風書題鹿盧榜觀寫飛廉銅牕開

神女電梁映美人虹虞捐濫天寵鄭督特懷忠莊生垂  
翠釣昭儀抵鬪熊馳輪有盈缺人道亦汙隆還念西陵  
舞非復鄴城中

建興苑

紀少瑜

丹陵抱天邑紫淵更上林銀臺懸百仞玉樹起千尋水  
流冠蓋影風揚歌吹音踟躕憐拾翠顧步惜遺簪日落  
庭光轉方幰屢移陰願言樂未極不道愛黃金

曲池水

謝朓

緩步遵莓渚披衿待蕙風芙蓉舞輕蒂芭笋出芳叢浮  
雲自西北江海思無窮鳥去能傳響見我測琴中

築城曲

張籍

馬駟中華古今注曰秦始皇三十二年得  
讖書云亡秦者胡乃使蒙恬擊胡築長城  
以備之淮南子曰秦發卒五十萬築脩城  
西屬流沙北繫遼水東結朝鮮中國內郡  
輓車而餉之後因有築城曲言築長城以

限胡虜也又有築城睢陽曲與此不同古  
今樂錄曰築城相杵者出自漢梁孝王孝  
王築睢陽城方十二里造唱聲以小鼓為  
節築者下杵以和之後世謂此聲為睢陽  
曲晉太康地記曰今樂家睢陽曲是其遺  
音唐書樂志曰睢陽操用舂牘是也按漢  
書曰梁孝王廣睢陽城七十二里而云十  
二里未知孰是

築城去千人萬人齊抱杵重重土堅試行錐軍吏執鞭  
催作遲來時一年深磧裏著盡短衣渴無水力盡不得  
拋一作休杵聲杵聲未定人皆死家家養男當門戶今日  
作君城下土

同前五解

元稹

年年塞下丁長作出塞兵自從冒頓彊官築遮虜城解一  
築城須努力城高遮得賊但恐賊路多有城遮不得解二  
丁口傳父口莫問城堅不平城被虜圍漢斲城牆走解三

因茲虜請和

一作請和

虜往騎來多半疑  
兼半信築城猶

嵯峨

四解

築城安敢煩  
願聽丁一言  
請築鴻臚寺  
兼愁虜

出關

五解

同前

陸龜蒙

城上一抔土  
手中千萬杵  
築城畏不堅  
堅城在何處  
莫

歎築城勞  
將軍要却敵  
城高功亦高  
爾命何處

一作足惜

大道曲

謝尚

樂府廣題曰謝尚為鎮西將軍嘗著紫羅

襦據胡牀在市中佛國門樓上彈琵琶作  
大道曲市人不知是三公也

青陽二三月柳青桃復紅車馬不相識音落黃埃中

採荷調

江從簡

樂府廣題曰梁太尉從事中郎江從簡年  
十七有才思為採荷調以刺何敬容敬容  
覽之不覺嗟賞愛其巧麗敬容時為宰相  
欲持荷作柱荷弱不勝梁欲持荷作鏡荷暗本無光

湖陰曲

溫庭筠

溫庭筠曲序曰晉王敦舉兵至湖陰明帝  
微行視其營伍由是樂府有湖陰曲後其  
辭亡因作而附之

祖龍黃鬚珊瑚鞭鐵驄金面青連錢虎髯拔劍欲成夢  
日壓賊營如血鮮海旗風急驚眠起甲重光搖照湖水  
蒼黃追騎塵外歸森索妖星陣前死五陵愁碧春萋萋  
灞川玉馬空中嘶羽書如電入青瑣雪腕如槌催畫鞞



白虬天子金鏐銍高臨帝座迴龍章吳波不動楚山晚  
花壓闌干春晝長

永明樂十首

謝朓

南齊書樂志曰永明樂歌者竟陵王子良  
與諸文士造奏之人為十曲道人釋寶月  
辭頗美武帝常被之筦弦而不列於樂官  
按此曲永明中造故曰永明樂

帝圖閨九有皇風浮四溟永明一為樂咸池無復靈

民和禮樂富世清歌頌徽鴻名軼卷領稱首邁垂衣  
朱臺鬱相望青槐紛馳道秋雲湛甘露春風散芝草  
龍樓日月照淄館風雲清儲光溫似玉藩度式如瓊  
化洽鯉海君恩變龍庭長西北驚環表東南盡龜象  
出車長洲苑選旅朝夕川絡絡結雲騎奕奕泛戈船  
燕駟遊京洛趙服麗有輝清歌畱上客妙舞送將歸  
寶相薄五禮妙花開六座明祥已玉燭寶瑞亦金輪  
生茂薛蘿性身與嘉惠隆飛纓入華殿屣步出重宮

彩鳳鳴朝陽玄鶴舞清商瑞此永明曲千載為金皇

同前十首

王融

玄符昭景歷茂實偶英聲長為南山固永與朝日明  
靈丘比翼棲芳林合條起兩代分憲章一朝會書軌  
二離金玉相三袞蘭蕙芳重儀文世子再奉東平王  
空谷返逸驂陰山響鳴鶴振玉躡丹墀懷芳步青閣  
崇文晦已明膠庠雜復整弱臺畱折中沂川詠芳穎  
定林去喧俗鹿野出埃霞香風流梵瑄澤雨散雲花

楚望傾澠滌日館仰鑾鈴已晞五雲發方照兩河清  
幸哉明盛世壯矣帝王居高門夜不析飲帳曉長舒  
總棹金陵渚方駕玉山阿輕露炫珠翠初風搖綺羅  
西園抽蕙草北沼拔芳蓮生逢永明樂死日生之年

同前

沈約

聯翩貴遊子侈靡千金客華轂起飛塵珠履竟長陌

永世樂

魏收

隋書樂志曰後魏太武平河西得西涼樂

其歌曲有永世樂

綺牕斜影入上客酒須添翠羽方開美鉛華汗不需闌  
門今可下落珥不相嫌

無愁果有愁曲

李商隱

隋書樂志曰北齊後主自能度曲嘗倚弦  
而歌別採新聲為無愁曲自彈胡琵琶而  
唱之音韻窈窕極於哀思使胡兒聞官輩  
齊和之曲終樂闋莫不隕涕雖行幸道路

或時馬上奏之樂往哀來竟以亡國李商  
隱曰無愁果有愁曲北齊歌也唐會要天  
寶十三載改無愁為長歡

東有青龍西白虎中含福皇邑世度玉壺渭水笑清潭  
鑿天不到牽牛處騏驎踏雲天馬獐牛山撼碎珊瑚聲  
秋娥點滴不成淚十二玉樓無故釘推煙唾月拋千里  
十番紅桐一行死白楊別屋鬼迷人空留暗記如蠶紙  
日暮西風牽短絲血凝血散今誰是

起夜來

柳惲

樂府解題曰起夜來其辭意猶念疇昔思君之來也唐聶夷中又有起夜半

城南斷兵騎閣道覆青埃露華先翠網月影入蘭臺洞房且莫掩應門或復開颯颯秋桂響非君起夜來

同前

施肩吾

香銷連理帶塵覆合歡杯嬾卧相思枕愁吟起夜來

起夜半

聶夷中

念遠心如燒不覺中夜起桃花帶露泛立在月明裏

獨不見

柳惲

樂府解題曰獨不見傷思而不得見也

別島望雲臺天淵臨水殿芳草生未積春花落如霞出  
從張公子還過趙飛鸞奉帚長信宮誰知獨不見

同前

沈佺期

盧家小婦鬱金堂海鷺雙栖玳瑁梁九月寒砧催木葉  
十年征戍憶遼陽白狼河北音書斷丹鳳城南秋夜長



誰知含愁獨不見使妾明月照流黃

同前

王訓

日晚宜春暮風軟上林朝對酒近初節開樓蕩夜嬌石  
橋通小澗竹路上青霄持底誰見許長愁成細腰

同前

楊巨源

東風豔陽色柳綠花如霰競理同心鬟爭持合歡扇香  
傳賈娘手粉離何郎面最恨卷簾時含情獨不見

同前

李白

白馬誰家子黃龍遶塞兒天山三丈雪豈是遠行時春  
蕙急秋草莎鷄鳴曲池風催寒梭響月入霜闥悲憶與  
君別時種桃齊蛾睂桃今百餘尺花落成枯枝終然獨  
不見流淚空自知

同前


戴叔倫

前宮路非遠舊苑春將遍玉戶看早梅雕梁數歸鷺身  
輕逐舞袖香暖傳歌扇自知秋風詞長待昭陽殿誰信  
後庭人年年獨不見

同前

胡曾

玉關一自有氛埃年少從軍竟未回  
門外塵凝張樂榭水邊香滅按歌臺  
牕殘夜月人何處簾卷春風鷺復來  
萬里寂寥音信絕寸心爭忍不成灰



樂府詩集卷七十五